

Елена Сараматова



Лугйөж

Елена САРАМАТОВА

Ауаҗың

Вакчи мадәсьёсын книга

Ижкар
2015

УДК 821.511.131-3
ББК 84(2=664.1)6-4
С20

Сараматова, Елена Александровна.
С20 Лудӧж : вакчи мадӧсьӧсын книга / Елена
Сараматова. – Ижкар : Редакция газеты
«Удмурт дунне», 2015. – 50 с.

© «Удмурт дунне», 2015
© Сараматова Е.А., 2015
© Курбатова Н. А., рисунок
на обложке, 2015

Пуштроез

Нылкышно нунал	6
Лушкаськись	13
Апай	18
Нугылиен шыд	25
Пуны	31
Лудчөж	38
Кучапи	41

Нылкышно нунал

Этюд

Нина куно возьма. Туннэ солэн вордйськем нуналыз. Жытазе лыктыны кулэ апаез нылпиосыныз. Соосты но, ассэ но, аслэсьтыз пизэ но ческыт куноято шуыса, кышнопалаз туж кема бергаз. Кырсь посудаез гурезь жужда люкаськиз. Миськыны шуыса, вадьсаз мыкыртйськиз, кранзэ позыртйз гинэ, кытысь ке мисьтйськон улысь пызйыны одязь чаж-чаж кезыт ву. Нина нырысь-валысь кытысь-марзэ өз но вала. Кранзэ ну! позыръя ук. Нош ву уг дугды жалыртэмьсь. Пыдъёссэ но коттйз ни. Учке но, кран бордысь корт гумыез сыномыса сисьмем но пилськем. Изолентаен лякыны уз луы-а шуыса учкыны выронъяз гумы кияз ик пырдйз. Ву эшшо золгес бызыны одязь. Соку гинэ Ниналэн йыраз чилектйз:

стоякѣсысь вуэз кысоно. Отчы-татчы бызылоньяз пукись вуэ гылзыса усиз. Кияз мучолоен зар-зар бёрдыны өдыз. Ныль аресъем пиез, дымбыр-йыг ваземез кылыса, дораз соку ик вуттйськиз.

- Саша, эн ветлы татй - котмод! - пиез шоры, оло, нырысьсэ кеськиз егит анай.

Аслыз ачиз йыркурзэ но кётжожзэ өз вормы ни, лэся. Тани-тани куноос лыктыны кулэ, шутэтскон нунал. Тол куазен но жаль-жаль зоре. Кинэ шедьтод таѣен гумы тупатыны? Ачиз вужзэ позыртыны, интыяз мукетсэ юнматыны выре вал, но зйгарыз вырзытыны ик өз тырмы. Ма, коркаяз плоски сяна, мукет инструмент но уз сюры. Коркан воргорон өвёл ке, ваньмыз тйяське ни.

Мучолоен ведраен бызылоньяз өсаз йыгаськись луиз. Улйысь бускельёсыз тышкаськизы, вёлдэтсэс коттэ шуыса. Ниналэн уката но синвуосыз өрьяськизы. Оло выждэ чүшалтод, оло бамьёстэ. Аварийной службае жингыртйз, но отын шораз ыргетйзы гинэ: милям ужмы өвёл со, сантехникѣсты өте. Нош таоссэ шутэтскон нунальёсы возмаса калыд быроз. Табере воксё вутэк улоз шат?

Нина телефоназ бугырьяськоно кариськиз: 152 номер, но таос пöлысь кинэ ке өтөд шат? Чыжы-выжыосыз кыдёкын, кышноос кужымтэмесь, тодмо воргоронѣсыз кышнояськемын. Кышнояськемзэ өть ай, кузпалыныз керетонэ пырод. Куд-огез сотэк но курдасагес шораз учкылэ, Нина огназ улэ ке, одно ик муртлэсьсэ капыртоз, кожало, лэся.

- Мар каргам нунал та? - бөрдэ нылкышно.

Пиез ялан котыраз мерске: маялтыса но, чупаса но, мама, эн бөрдэ ни, шуэ. Кытысь ке кампет но вуттйз ни: сиид ке, мылкыдыд, пе, капчиялоз. Ко-нялзэ куртчиз но, Ниналэн ымыз уката курыт луиз. Пиез уго со куспын вазыса вуттйз: папамы луиз ке, туж шудо уломы ай. Нылкышно воксё но куасалскиз.

Син шораз шөдтэк шорысь йөтйз ужысьтызы воргоронлэн номерез. Кышноеныз люкиськемын. Котьмалы кибашлы, но дырын-дырын туж азытэм. Юылэ. Коллективын огназгес возиське. Ма, кышно-ос пöлын трос уд зулы. Оло, сое юрттыны куроно? Сазь ке.

Нина Колялэсь номерзэ бичаз. Кепыраса му пыр вияське вал. Мурт воргоронэз ачиз өте - кыче возьыт! Соин ик куинь гудок мынэм бере телефонзэ куштйз. Но воргорон ачиз жингыртйз. Нина туннэ шугадзонэз сярись солы пулемётэн кадь тачыртыса вераз. Олокöня пол шуиз: тэбинисько шуыса, вождэс эн вае. Коля нёръяны öдъяз: мон городын öвöл, туннэ уг быгаты лыктыны.

Ниналы вордскем нуналыз кулэ öйлась ни. Кунооссэ лыктыны öз лэзы. Вазь выдо но изё, малпаз. Бөрдыса катыгэммиз. Пизэ зыгыртйз, погыллыськоньязы кыксы но умме усизы. Öйтод, көня көлысалзы на, вылды, но öсэ йыгаськись луиз. Нина усйтйз но - Коля. Шöмаськемез вань. Кияз бадзым пуйы мандарин но сяська керттэт. Долкаменыз Нина номыр вазыса

өз вутты на, воргорон корка вамыштїз ни, вордске-
меныз җечкылаз, кылиськиз, саесъёссә пужаляз но
мисьтїськон пала вамыштїз. Возьматы, пе, кытїыз
мар, телефон пыр номыре өй вала.

Выль гумыез интыяз пуктыны выронъязы Сашик
но сайказ. Тодмотәм воргоронез адзыса, соку ик
анаез борды җиптїськиз:

- Со мынам мамае, - шуиз.

Коля но өз куалекты:

- Мон мамадә уг лушка. Чай юо но кошко.

Сашик шкафе йырыныз зымиз но җашаосты пот-
таны кутскиз. Чайникләсь җоксәтсә җутъяз.

- Вуэз вань ай, - шуиз со, кнопказә зїбиз.

Чайник җашетыны өдъяз.

- Таид улля ни, - вазиз Коля, җөк сьөры пуксьы-
са.

Нина ву лыктыны кутскемлы шумпотәмысь-
тыз, вань дасям сиёнзә җөк вылэ поттаз. Сю грамм
верьятэк но, кудзем мурт кадь лөпшаз. Верась-
кисьгәм Коля но бөтгыртыны кутскиз. Анаезләсь
капчи мылдыдо луэмзә адзыса, пиез но мурт вор-
горонез уллямысь дугдәм гинә өвөл, солы маши-
наоссә возьматгыяны өдъяз. Коля капчи кариськиз,
пияшез ки йылаз вылие но җутъяз, вал кариськы-
са, пельпум вылаз но ворттылытїз. Ниналэн меҗак
«кошкы ни» шуыны ымыз өз бералтїськы ке но,
«жади ни туннә» шуылїз ик. Но Коля тае кылымтә
улсы кариськиз, нылкышноләсь вушйыләмзә но
адзымтәяськиз.

Нина часэз шоры учкыку, дыр уйшорлэсь орт-
чемын ни вал. Пиез но мультфильм учкон сяме-
ныз ик диван вылэ умме усем. Чупатэк но изьтй
шуыса, сյулэмыз ик чепыльскыз. Шобыртыны
шуыса, Саша вадьсы мыкыртйськыз, вешаз. Со
куспын Коля кочыш кадь вуиз но мышласянь
Нинаез зыгыртйз. Пось киосыз дэрэм пыртй но
нылкышнолэсь кузэ сутйзы кадь. Ниналэн шо-
канэз ик чоксаськыз. Куинь ар воргорон киосты
шодылымтэ мугор пөсектйз. Ниналэн бамьёсыз
ик пиш-пиш горд луизы.

- Мынам тынэсьтыд ческыттэ шөдэме потэ, -
кудзем мурт кадь сипыртйз Коля.

Нина таҷезэ өз возьма вал, тодмоезлы жингыр-
тыкуз, өз ик малпа та сярэсь. Коля шоры воргорон
шоры кадь өз но учкылы вал. Нош мурт киос кый
кадь котырто ни мугорзэ. Кытысь кужым шедьтйз
Нина - мозмытскон вылысь зйрак берытскыз, иш-
калскыз но лек куараен вазиз:

- Кошкы, Коля! Берт ни. Эн иса но-ку! Собре
тыныд но, аслым но туж возьыт луоз. Асьмелы одйг
азьын ужано.

Пиосмуртлэн синьёсыз ик жуатскизы.

- Крандэ юри өд тйя вал шат?

Тазы малпаны луэ шуыса кылэмез бере Ниналэн
сյулэмаз ик куртчиськизы кадь. Мар вераны но өз
шедьты ни.

Воргорон чалмыт дйсяськыз но, өсэз йыг! вор-
саса, ышиз. Нош Нина, чигем боды кадь, пиез вөзы

выдйз. Азылолэсь но зол, тымиськыса улэм кадь, синвуосыз кисьтйськызы. Шобрет сэрег ик котмиз соосты чүшылыны выронъяз. Ялан сипыртэ:

- Ултйяд ук тон, Коля, ултйяд монэ. Ачид но шөдылытэк, ултйяд. Мугоры пиосмурт шуньтлэсь мөзме ик. Оген секыт. Сайканы. Чай сульгыртыны. Уже гызмыльтыны. Ужамъяськыны. Доре бертыны. Жингыртйсь пыпытлэсь но бушлэсь мозмытскон вылысь телевизор я радио лэзыны. Көтэз тырыны. Выдыны. Секыт кезыт валесэз берпуметй шуньтэн шунтыны. Умме усыны. Уйин сайканы. Секыт. Секыт оген. Макем капчи яратоно адямиед понна улыны! Капчи со сярэсь малпанэн сайканы. Мисьтйськыны. Капчи уже бызыны но ужысь бызыса бертыны, куддыр отысь пегзыса кошкыны. Плита азын сылыны. Ортчем нуналдэ тодад вайыны но выль иворёсты гажанэдлы вераны. Капчи солэсь но мылкыдъёссэ кылзыны-чакланы, солэн шумпотонэзлы шумпотыны. Яратоно муртэд понна валес шунтыны. Капчи. Чошен ваньмыз капчи. Оген секыт. Секыт ачид но пиед понна гинэ улыны. Сашик азын бөрдэм но уг луы - куректэмез адзыса, ачиз но синвуаське. Собере пинал - со тынад оглюкетэд, со тон. Оло, соин но астэ оген шөдоно. Воргоронлэн яратонэз понна но улэм потэ. Яратон, оло, выльысь бурдясал монэ, оло, мылкыдын ужаны но кутскысал. Секыт ик оген.

Но тон монэ ултйяд, Коля. Кинэн ке көлэме потысал ке, пиме чыжы-выжыосы доры кельтысал,

корка тросам сюсьтыльёс жуатысал, ненег крезь-гур лэзьысал! Нылмурт сюлэм чылкытсэ, ненегзэ, чеберзэ возьма. Огдырлы ке но выжыкыл дуннее вуон понна гинэ но шуныт кусыпъёсты вите. Пиналы вёзын ик пичи диванын кёня ке минут понна зыгырьяськом шат? Кыззы собере тодэ ваёнъёсме ньылом? Аслэсьтым юрдо ук. Пиосмурт борды чик дышытэк, соин эшгьяськытэк, одиг уй понна гинэ вузаськом шат? Лултэм, номыре шөдылйсьтэм мунё өвөл ук мон! Яке пиосмурт синмын мон «капчи сиён»? Шудон? Нылпие вань бере, воргоронлы зудыса, котькин улэ выдо, кожало шат? Мон анай! Кулэ луиз ке, ачим быръё аслым кулэзэ но ярасьсэ. Эх, Коля! Али гинэ сыће-сыће тау кари ужедлы. Нош бордам йөтскид но, аслэсьтым ачим ик юрдыны кутски. Зыгыртэмедлы мон дась ой вал. Осто, малы таће секыт кышномурт луыны?!

Берпуметй кыльёссэ веракуз, кеськемзэ но валатэк кылиз Нина. Сокем курыт луиз сюлэмаз. Бёрдэмысьтыз пиез но сайказ. Анайзэ юн-юн зыгыртйз но шуиз:

- Эн бёрды, мама, синъёсыд кужекъялозы. Будй ке, кранэз ачим тупатъяло...

Луцкаськись

Верос

Малы меда анае сыће шудтэм? Куддыр шо-рам сыће-сыће мөзмыт синьёсын учке со, мугор ик юзыр-кезьыр-р-р луэ. Сыће вакытэ бордаз зыгьртйськемдэ ик уд валаськы. Шунтэм потэ сое. Но уг вормиськы. Мугоры пичигес на, лэся. Ма, тямыс арес мыным. Агай быдза будй ке, школаме йылпумъяй ке, одно сюлэмзэ шунто анайлэсь!

Тазы ас понназ малпаськыса, Коля огпол гинэ уг берты. Куддыр өсэти пырыны ик кышка. Курда анаезлэн мөзмыт синьёсыныз пумиськыны. Бөрдо-но кадь синьёссэ адзыса, со ачиз огпол уз чида ни - зар-зар викышъяны кутскоз, аслэсьтыз лябзэ возь-матоз. Сотэк но ляб ук - анаезлэсь мылкыдзэ жуты-ны уг пөрмыты. Нош со - пиосмурт, озыен, солы юн кариськоно. Уката ик али, агаез армиын дыръя.

Коля али юртазы огназ воргорон. Соин ик ляб лү-эмдэ возьматыны ноказыы но уг яра.

Но весь кужмо кариськыны уг луы. Огпол школаысь бертйз но, синьёсыз ик палёмизы: жок был трос ческыт сиён. Кампетъёс, печенняос, нянь но «Сгущёнка». Берлозэ Коля магазиньёсысь чем адже, но огпол но ымаз понэмез өвёл. Макем ческыт, дыр, со. Эшъёсыз ушъяськылызы. Эх-х-х, верья вал! Чечы пуньы йылын ке но. Но уг яра. Анаез ваньзэ тае агаезлы армие посылкаен лэзё шуиз вал. Уг яра.

Ческыт сиён сярись малпанъёссэ йырысьтыз уल्याн вылысь Коля телевизорзэ но лэзьыса утчаз, урокъёссэ лэсьтон борды но кутскылыз. Ворсам банкаысь зын уг гочаты ке но, ныр ачиз со пала «учкылэ». Отын куинь банка напчытэм конял йёл ук.

- Огзэ гинэ усьто. Агай валатэк но кылёз, анай солы куиньзэ басытйз вал шуыса. Солы кыкеныз но тырмоз. Нош анай юаз ке, ой адзылы шуыса, танысь-ко.

Таёе малпанэн ик Коля огзэ банкаез кырмиз, кисыяз усьтон донгиз но чульк! коркасьтыз потйз. Анаез медаз адзы шуыса, васькиз бакча бертйзы кошкись шур доры. Куакъёс пушкы ватиськиз. Усьтонзэ озыы но, тазыы но бергатыны выриз. Но пичи пась сяна, лэсьтыны өз быгаты. Мугорыз но вань ни кадь, нош зигарыз банка усьтыны гинэ но уг тырмы вылэм.

- Я, усътйськы ни, курисько, - аслыз кылымон гинэ сипыртэ Коли.

Аслаз дыльдюсыз шыр-р-р! вияло ни. Чурыт кортлы йырыз курен сюлэмыз но пазяське ни. Лупкаськиз шуыса, көтыз жожен синвуосыз но васько ни. Нош со ялан пырске банказэ усътыны.

- Малы тон мыным уд сётскиськы? Лупкаськеме понна шат? Тонэ туж-туж верьяме потэ ук. Огпол гинэ көты тырымон сиё но больше ноку-ноку ымам но уг тырылы ни. Анайме но ноку уг куры ни тонэ басытыны. Усътйськы ни, - тазы тэльмыриз со «Сгущёнкаез».

Но банка ваменскиз. Эх, шу! Эх, шу! Көня пол меда та кыльёсты сипыртйз Коля, выльысь но выльысь усътонзэ кияз бергатыса. Кырымпыдэсыз но жуаны кутскиз. Ма, корт борды чиньызэ но чабыштйз ни. Таки толыкез өз тырмы. Бератаз усътонзэ ик ыргалтйз но банкаез ымдураз кымалтйз - пичи пасьысь зизыраны кутскиз йёлын, сакырен напчытэм сурет. Ой, ческыт ук! Кылдэ ик ньылод. Инмарьёслэн сиёнзы, дыр, та. Нокыче кампет кулэ өвёл. Тае гинэ сиысал. Тазы ас понназ малпаз Коля.

Жаляса верано, соку ик голытраз. Сгущёнкаез ньылоназ кутъаз. Жынызэ но өз сиы на, нош көтаз уг васькы ни. Коть шур дуре мын но отысь вуэн ньылондэ гылты. Но кызы со пожез юод? Зазег-чөжъёс пыласькемен сэрэн со вож-вож сяськая ни. Одйг ымтыр коть зүзид ке, больницае усемдэ ик уд вала. Коляез эмьяны кельтйзы ке, анаез аслыз кытчы

пырон инты уз шедьты. Солэн пиезтэк но сюлмась-
конъёсыз лачак. Сотэк но ужысь дораз бертэ но
соку ик диван вылэ ланьырске. Оло, ачиз но висе, уг
гинэ вера. Выдэ, синъёссэ кыне, вераськемысь дугдэ.
Куддырья куаратэк но синвутэк бөрдэ. Кытйяз озы
ик умме но усе. Коля, сайкатыны кышкаса ик, луш-
кем шобыртэ мумизэ. Вöзас аслаз но ланьырскемез
потэ. Но уг дйсьты. Мед көлоз. Котыраз лобась кут-
эз но улля. Анаезлэсь чиньыоссэ, котькудзэ чупаса,
шунтыны но дась со - мед гинэ изёз. Кöлькуз уго
сюлмаськемысь дугдэ. Озыен, кызы Коля дйсьтоз
солэсь али көтсэ жож карыны, зынмем шурысь вуэз
юыса? Уз, уз дйсьты.

Аслаз гольтыраса шокчемез но уг луы ни. Кияз
банказэ бергатэ но малпа: кытчы табере тае? Доре
берен уд пырты. Зэм, анайзэ кунояты вал. Но со
лушкаськемзэ тодйз ке, синвуаськоз, тышкаськыны
кутскоз, мон тонэ адями карыны вырысько, нош тон
ерпечка кадь будйськод шуыса, куаретоз. Соин ик
Коля, сюлэмыз вöсь луыса ик, «Сгущёнказэ» сюе
согиз. Татын сое нокин уз шедьты.

Ымдуръёссэ нюлыса, киоссэ шурын гылтыса,
Коля жыт гинэ дор палаз шонтйз. Пыдъёсыз уг нуо -
олокöня корт банка думылэмын бордазы, кожалод.
Быдэс гурт тыр шальтыр-шальтыр вазё, «лушкась-
кись бертэ» шуо кадь. Коть ачид ик «Сгущёнкаед»
вöзы сюе пыр!

- Малы мон со каргам чечымеz лушкай ни?!
Ачим жынызэ но öй быдты. Кызы корка пыром?

Мар анайлы шуом? Бордысьтым ческыт зын лө-
сьяське ук. Одно шөдоз. Ярам, тышкаськиз ке. Сое
гинэ чидало. Но со номыр вератэк быгатоз ук. Сыче
дырья капчи шат сүлэм вылын?! Öвөл. Луҷче соку
ик лушкаськемдэ ачид вералод, - асэныз тазы ве-
раськыса, корка пыриз Коля.

Анаез юртъер пушкын öй вал. Жöк но бушат-
эмын ни. Озыен, агаезлы посылка келямын. Зэм,
шораз ик сылэ одйг банка «Сгущёнка»...

Анай

Новелла

Сузэръёсы пöлысь монэ огнаме басьтйзы. Кыче ке апай дорам матэктйз но кузёмылы шуиз:

- Айы писэйпи утчасько.

Со кыльёсты вераса вуттйз-а, өз-а - мон борды кырмиськиз. Кезыт толэн кынмем киосыныз шунит мугорме ымныр вадьсаз жутйз. Оло мыным, оло аслыз сипыртйз:

- Кыче чебер тон! Пурысь луод. Озы нимало тонэ. Та ним буёлэдлы но туж тупа.

Собере кузёелы уксёзэ мычиз. Монэ шунит пияз понйз но азылань вамыштйз. Кытчы та монэ нуэ? Бертом, сиюдо шуыса сипыртэмезлы осконо-а? Сузэръёсытэк кызы улом? Воксё огнам мөзмыт уз луы-а? Оло та апай сузэръёсы дйне но чюказе лыктоз на?

Зуркыт сюрес кузь вал. Синъёс дйсь улын номыре уг адъо. Таин сэрен сюлэм уката пирсэкъя. Кыче адыми ки улэ мон шеди? Ог-огмылы тупаломы-яраломы-а? Жаляны валась кадь та апай. Котьма ке но, огкыл шедьтомы-а? Маин сюдоз со монэ? Чорыг яратэмме азьвыл кузее өз вера.

Оло нош туж умой ай, та апай монэ аслыз кариз шуыса. Азьвыл кузее монэ жуге вал. Чабкылиз но, чыжаз но. Ачиз рос-прос өз сюдылы но, кот сюомен, сузэръёсме жалямен, жок вылэ лушкаськыны тубалляй. Кузее өз жаля. Огпол кезыт подъездын колтйз: йонтэмьяськиськод, пе. Кинэз но өз лёга соку быжме! Тйяськытэк кылем интыез ик овёл ни, дыр. Соослы шудыны ошемын, кожало, лэся. Чиньы вылазы позыръяны но ярато. Со сяна, лек тушмон куме кеся ни вал. Урмем пуны сярись верасько. Кузеез мырдэм вуттйз сое кутыса - чыртысьтыз гозыез ик чигиське вал.

Таиныз апаен одно эшъяськомы! Сыче бадзым осконэн пыри мон выль корка. Шонергес вераса - монэ пыртйзы.

Выль сэрег кельшиз. Чылкыт. Выжез гинэ ке шат дышымтэ вылысь юн гылыт. Лакен укыр ташташ буаллям. Чебергес озьы адзиське, кожало, лэся. Уг валало: яд со. Вылтйз голык пыд лёгаськыны уг яра. Ярам ни, мар карод на табере - тэргаськыса кыдёке уд вуы. Мон диван вылысьтыз уг васька. Туж небыт со. Гижыос ик лыдыны кутско, ява. Мон таће ненег интыосын ой пукылы на.

Котьма ке но, маин меда сюдоз та апай? Толон жыт дырысен ымам номыр ой тырылы. Апай, кема эн утчаськы! Азыло ик од дасяськы шат монэ пумитаны? Мар отын кыче ке пул пызен выриськод? Монэ горшоке ветлыны дышетыны малпаськод шат? Уг поты мынам! Мон адями шат? Уг, уг даурты оломар но. Лучче нырысь сюд ай.

Я, ческыт зын вёлскиз кадь. Мар со? Кыче ке сйль юдэс кадь. Кинлэн меда?

Озы малпаськытозам, апай нырме тусьтые донгиз ни: тани, пе, си. Вань пасьёсы ик чоксаськызы. Кызы сиemed потоз на! Малы та адямиос одно ик ымнырез тусь доры вутто? Асьмелэн пыдьёсмы вань шуыса, уг валало шат?

Шокчыны выроньям кизэ чабтйськем, лэся. Апай черектйськиз но бордысьтым палэнскиз. Таиз но чыжоз шуыса кышкаменым, шкап сьоры пегзи. Сюлэмы куалекьямысь дугдэм бере кылй: апай монэ дораз өте, сиськом, шуэ. Тусьтые йол но лэзе ни кадь. О-о, йо-о-о-л. Зынзэ тодмасько.

Потй. Кудзытйсь зынлэсь йырме сазёмытыны вырытозам, апай нош ик кырмиз монэ, сиён дуре валтыны кутскиз. Пыкиськыны выри ке но, ныры нош ик зымиз сиёнэ, нош ик, валатэк кылыса, чабтй апаез. Соиз куатаськиз но ас палаз кошкиз: сютэм, пе, ул.

Чап со вие телефонэз жингыртйз. Уг тодйськы, мар вазызы трубкалэн сопал пумаз. Нош апай кинлы ке шумпотыса пулемёт кадь тачыртыны одяз:

- Мон писэйши басыгй! Табере, доре бертыкумы, асьмемыз пумитась луоз! Огнам дырья но со мыным матысь эш луоз. Пеймытлэсь кӧшкемакум, вӧзам улэп лул луоз. Мӧзмыны но уз сѣты. Туж мусо со. Ачид синмаськод ай, адзид ке. Зэм, со али мурт каре на монэ, уг сиськы. Но мон сое озыы но яратйсько. Калыкын шонер верало, дыр: нырысь животгѣсты утялтыны дышетскы, собере нылпидэ но вордыны секыт уз поты. Писэйпимы пичи пинал кадъ йӧтэ. Нимыз но вань ни: Пурысь. Алѣша, мар чалмыт улйськод? Шум уд потйськы шаг?

Эх, малы меда пельѣсме телефонэд доры ой пуктылы? Кинлы тон мон сярсысь ушгьяськид, апаЙ? Нош мар вазиз кылзйсед? Маке уродзэ? Малы тусыд соку ик кунэрес луиз? Ымдурьѣсыд пеперскизы, сингѣсыд котмизы. Бератаз воксё но гундылыса-гундылыса вазид:

- Ой тодылы, та иворе тыныд уз яра шуыса. Урамысь кочыш-пуныос шоры синмаськыса учкиськод но, доре живот басыгй ке, шумпотод, кожай. Оло, воштйськоз на малпанэд?

Та юанэд чузьяськем бере пельпумѣсыд воксё но лэзькызы. Трубкадэ куштйд но пукон вылад ланьырскид. Шорам жальмаса учкид. Сиськымтэе понна йырде весь кур кариськод на шат, апаЙ?

Но апаЙ монэ оз кылы. Кытчы ке дйсьяськыса потйз. Туж кемалы. Пеймыт луыны кутскем бере гинэ берытскиз. Кышкай вал: куштйз таид монэ. Всеяклы кельтйз. Соин ик берытскемез бере йӧлзэ

пичи зүзүылоно кожай. Апай ик шумпотйз, ты-бырме маялляно кожаз. Ачим но куанй. Бордаз вешасконъям умме усемме ик валатэк кылиськем. Сайкакум апай синъёсам жалъмыт учкиз но вождэ эн вайы шуыса сипыртйз. Малы? Кужмысь сюдыны выремед понна-а? Но та юанэз со өз кылы. Паймыса ик выдй кёлыны.

Вазь чүкна сайкай. Небыт валес. Мылкыд ик лөптэ, ява. Изись апайлэн кузь йырсиеныз шудэме потыны кутскиз. Солы та малы ке өз яра. Монэ кутйз но музэ васькытйз. Выльысь туби. Шорам учкиз но эшшо огпол простить карыны куриз. Собере дйсяскыз-мараз но монэ куртка улаз донгиз. Малы? Кытчы нош ик нуэ? Огнаме кельтыны жаля?

Таяз рад апай кылйз кадь монэ. Сипыртйз:

- Ум быгатэ асьмеос чёш улыны, Пурысь. Картэ тынэсьгыд мозмытскыны куриз, какед вылэ лёгиськемезлэсь кышка со. Туннэ командировкаысь бертыны кулэ. Кельтоно луисько тонэ.

Та кыльёсты валаны выронъям, апай ураме потйз. Жужыт коркаос доры вамыштйз. Огез подъезд дорысь мукетаз мынэ.

- Тонэ кинлэн ке өсэз доры кельтй ке, оло, жалялозы но басьтозы доразы. Муртэн тыныд умойгес луоз, - ялан сипыртйз апай.

Синвуэз нырме ик коттйз.

Матысь өсьёс өз усътйське. Апай дораз бертоз но монэ но ас сьёраз кутоз шуыса, оски. Нош со

пуксиз дыбыртїсь трамвае. Жоген васькиз. Нош ик вамыштїз жужыт коркаос дїне. Больницае но пыраз. Татчы ик кельтїське ни вал монэ - адямиос чѧп потїзы, люкетїзы. Возьдаськиз, лэся, апай соос азын монэ куштыса кельтыны. Кияз ик кыли. Озы мон выльысь вуи тодмо интые - монэ вузам ураме. Зэм, азьвыл кузёме апай өз шедьты. Муртгёслы, вузчиослы, дэмланы выре вал, кулэ өвёл кочыш, шуизы: зын гинэ, пе, потэ со бордысь. Апай калгись пуны-писэйесты утыны юрттїсь приютэ но ветлїз. Уксё но тыро, басытэ гинэ кочышпиме шуыса, тэльмыриз. Милемды кыкнамес но уллязы. Туж шумпотї. Татысь четлыке пунням животгёс бордысь уго вёлске шой зын. Татчы мон ачим ой кылысал. Ярам ай, уллязы.

Кема калгеммы бере апай ас дораз ик берытскиз. Монэн. Шумпотї. Озыен, чопен ик улом ни? Мон асме умой возё. Эн курда, пыд улад уг кагы. Горшоке ветлыны дышетско. Кылїськод-а? Йырсиеныд но уг шуды. Маяллясько кожей вал, нош тыныд кельшымтэ. Жок вылад ноку уг туба. Картэд дорын дырья шкап сьорысь но уг пота. Ойдо чош улом ни, апай.

Выль сиён лэсьтїськод кадь. Чорыг? Мыным? Ой! Ческыт ке, ческыт ни. Но шорам малы сыче жож учкїськод? Ялан простить карыны курїськод. Нош ик ватод-а монэ куртка улад? Таяз рад кытчы валтод? Общежитие?

Шонер шөдйськем. Татын туж трос писэйтс.
Олокыче арлыдоосыз но, пөртэм буёлоосыз но
вань. Соос пöлы ик кельтйд тон монэ, апай. Шуйд:
тыныд татын умойгес луоз, эш шедьтод. Куштйд.
Öс доры ик кельтйд. Монэ кин ке öс куспы пачка-
тыны быгатоз шуыса, öд ик малпа. Кошкид. Ярам
коть, кезыт лымы вылэ öд выдты. Аслэсьтыд ныл-
пидэ но озы куштысалыд-а, апай? Нылпи юртысь
басьтэм пиналэз но озы ик берен сапкысалыд-а?

Зэм, кык час улыса, тон вуид на монэ эскеры-
ны. Сюлэмыд öз чида, лэся. Тодэмед потйз, кыче
мон татын шокасько. Тон туж оскид, монэ кыче ке
нодтэм пинал ас дораз пыртйз шуыса. Со осконэд
быдэсемын öй луысал ке, мон пыд улад шедьысал
ке, тон монэ ас дорад берен басьтысалыд. Но мы-
нам аслам öз поты ни тон доры матэктэме. Соин ик
öй пота кезыт но пеймыт сэрегысьтым. Синмыд
лябен, öд адзылы монэ. Дорад лушкем öтыны ке
но вырид, öй вырзы. Эх, апай, мурт апай...

Нугылиен шыг

Этюд

Семьяме паймытэме потйз. Шуозы: укмыс арес гинэ ай, нош со шыд пöзытыны быгатэм ни. Эх, ушь-ялозы ук! Нугылиен пöрам, кылдэ ньылод, шуозы. Мон ачим туж яратйсько нугылиен шыдэз. Пересь нэнэлы но со туж кельше. Оло пиньёсыз öвöлэн, оло мукет муген тазэ со чөмгес пöзытэ но, ымпушказ мугылляса-мугылляса, кема-кема сиыны выре. Со мугыллямез туж мусо адйське! Мон ноку озыы уг сиськиськы. Кытысь ке кылэме вань: котькуд ым-тыр сиёнэз куамын куать пол кушано, собере гинэ ньылоно, соку жүшед умой ужалоз, пе. Нырысетй пуньы сиёнме рос-прос сыскыны вырисько ик ай, нош отйяз чидан чиге но, кушатэк ик быдэс тусьтыме ньылйсько. Шудыны потыны уг вуы ни, кожасько, лэся.

Нош туннэ ачим шыд пöзыто. Бакчаын бычыясь-кись вож кальчаез юдыса поно. Уг вунэты лавр куарез! Нэнэ сое адземпотостэм каре ик: кузьял шöмыз, пе, вань. Но туннэ мон пöраськись ук. Мынам шыдам лавр уз кузьялзы!

Но кытын пöзытом ай? Огаз кострюльын - толон жыт сиыса быдтымтэ картошка пунем. Анай сое бушатыны вунэтэм. Нэнэ но почтае пенсиез дуре кошкиз. Отысь олоку вуоз ай. Нош со анайлы индылыз вал: пунемдэ эн кисьты - парсьпиослы судо, пе. Ма, анайлэн посуда бушатыны дырыз но öй вал. Быдэс жытсэ дышетскисьёсызлэсь контрольной узжэс эскериз. Нош чукна вазь ик кошкиз, совещание, пе, райцентре люкало. Сыче дырья со воксё катыгэммыса бергэ. Сютэм вуиз ке, шыдэлы туж шумпотоз!

Пичи мискаез кутано шат? Нош атай но сютэм вуиз ке, кинлэн гинэ көтыз тыроз? Шкап пыдэсын одйг чебер кострюль кемалась утиське ни. Таچه бадзым нунал дырья - мон пöрасько ук - сое кутыны сьöлык уз луы, вылды!

Быдэс йырыным кылтыр-колтыр ик зыми шкапе. Шедьтй со кострюлез. Чуж-чуж чия, чабтйськем интыез ик öвöl! Бордаз кыче ке бумагаез но вань на. Зэм, со чужектэмын ни - гожтэмзэ лыдзыны уг луы. Кытын но ку поттэмын шуыса, верамын вал, дыр.

Со бумагаез чабьяса ик ву улын гылтй. Миска тыр кезыт ву лэзи но плита вылэ пуктй. Ачим холодильник доры дыртй. Со куспын асме индылй:

сйльзэ ву быректэм бере пононо, шуэ анай, озыы, пе, шөмыз ческытгес луэ.

Курег макесъесты миськи. Кальчаез но, бакчаысь пыртыса, вандылй. Нош вуэ ялан уг быректы. Возьмаку дыр туж кема кыстйське вылэм. Быректы ни, собере картошез паланы кутско, шуи вулы. Нош солы номыр кадь өвёл. Миска пыдэс колъыртыны кутскиз, вупульыос лөптыны өдъязы гинэ, мон сйлес вуэ куштй ни. Ачим картошка палан борды басытйськи. Тани мисько, юдо но нугыли лэсыгыны кутско. Кеносысь пызь пырто, курегпуз шукко, сылал поно - адзоды ай, кылдэс ныллады!

Шөдтэк шорысь нэнэ бертиз. Сумказэ, вормыса но вормытэк, гур азь пала нуэ. Тросаз басыськем таид. Котьку сямен одно ик пряник-печення, мороженой вайиз, луоз. Эх, шулдыр нунал - зэмос праздник.

- Нэнэ, тон кырын поръя на. Шыдэ пөзиз ке, пырыны косо, - вази мон, шыдме огнам пөраме потэмен - пересымы одно юрттйськоно кожалоу ук, монэ пичи на карыса.

Нош нэнэ, та кыльёсме кылыса, куалектиз, лобась папа кадь, чабкиськиз. Миска шоры синъёсыз усем бере быдэс ымнырыз, кузял пот сием бере кадь, кузялэс луиз. Пичиесь синъёсыз солань-талань бызъылыны кутскизы. Ымыз усьяське, нош куараез уг поты. Интыысьтыз ишкалскиз, кострюль борды, пөсез шөдылытэк, голык кыин кырмиськиз но шыдме парсь сиён ведрае кымалтиз. Об-об-об шуыса, кострюльзэ кана вылэ пуктиз. Сутйськем

киоссэ пелля ук, пелля. Кранысь бызись кезыт ву улэ донгыны турттэ ни вал соосты. Вузэ но лэзиз. Но шуак кранзэ бералтйз но выльысь бызыса дыртйз кострюлез доры.

Мон интыгысьтым вырзыны ик ой дйсьты ни. Асме парсылы дасям сиёнэн ведрае донгоз кадь йөтйз. Юай ик: тон мар дауртйськод? Но нэнэ монэ воксё өз кылы кадь. Синвуаськиз. Кострюльзэ, пичи пиналэз музэн, бордаз жиптйз но музэ ланьыраз. Эх, маялля ук посудаэз. Бөрдйсь пиналэз буйгатыны выре, кожалод. Шораз пелляса но утча. Маке кылабура. Нош маялтэ, нош чупа.

- Нэнэ, тон өд шузимы-а? Мон нугылиен шыд пöзйтйсько вал!

Та кыльёсы вырзытйзы сое - шорам, йырзэ сэзь-яса, кётжожен учкиз. Собрере мырдэм кылымон сипыртйз: кинлэсь юад тон, яра-а мискаме йöтылыны шуыса?

- Шузимемед кадь тон, нэнэ, - вази мон, - шыдэз арам карид. Нош мон тэркы пыдэсам сугоньёсты кельтйсько ке, йыркурьяськонэдлэн пумыз өвөл: тазы сиськид ке, ванез ноку уд адзы, шуиськод. Нош ачид курег макесъёсты но өд жаля.

Тазы куаретэмме нэнэ воксё но уг возьма вал кадь. Гуньдйз. Огдырлы шокамысь ик дугдйз кадь. Бератаз гинэ мур-мур лулзиз:

- Тон монэ али уд вала, нылы.

- Мае мон валаны кулэ? - йыркуре ноказыы буйганы уг вала.

- Та мискаез Ерофей кузьмаз вал ай. Вордиськем нуналам. Шумпотто кожаз. Нош мынам малы ке кӧты жож луиз: тынад интыед гур азын шуэмез потэм кадь. Дэрэм я басма кузьмамзэ возьмасько вал соку. Воштыськон дйсе умой ой вал ни. Егит дырья дйсяськем потэ на ук. Оло кунэрскемме адзыса, оло малпанъёсме лыдзыса, Ерофей каньылак вазиз: вуж кострюльмылэн пьдэсыз усе ни, соин ик басытй выльзэ, нош дэрэм дуре ёшен мыном. Базарозь пьдмы оз сузы. Ерофеез ферма гидысь мозмытскем ош лекаса, пьд улаз лёгаса, вииз. Нош адземпотостэм кострюлез самой дуно арберилы пӧрмиз, - синвуаськиз пересь. - Сое киям кутйсько ке, туннэ ке но Ерофее тодам лыктэ: мынясь, таза, чебер. Валтысь зоотехникын ой ужасалыз ке, оло, туннэ ке но ёшеннамы со кострюльысьтыз пьдэз зызылысалмы на.

- Шузимемед ик кадь тон, нэнэ. Кулэм карттэ мискаен ёшаты ай...

Йырма сэзьяса ик, кошки соку дорысьтыз. Кострюльзэ шкапысь бератаз ой адзы ни - пьдло ватэм, лэся. Кулон аяз гинэ кытысь ке поттйз сое. Соку нэнэме пичи йыр визьмыным валаны ой пӧрмыты. Солэн шӧдонэз, солэн вӧсез дорозь сузтыськыны ой вормы.

* * *

Алигес куать аресьем нылы зыретэн табань пыжыны куриз. Шкапысь посудаос пӧлын

кытыр-колтыр бугырьяськыны кутскиз. Кы-
тысь-марысь шедьтйз ни чыж-выль табаез. Дораз
вуытозям, пыдэсаз көсвöй но кисьтыса вуттйз.
Нош мон куалектй. Табаез лыптыр-лоптыр киям
кутй но бордам юн-юн зыгыртй. Вöесь луэмме ик
öй шöдылы. Вордэм нылылы сётыны кыче ке таба
жаль потйз! Ачим но жалясько ай сое кутылыны.
Пилиськоз кадь - сокем утыса возисько. Со табаез
кузьмаз вал яратоно муртэ. Ачиз вöзам öвöл ни, нош
табаез туннэ но дуно. Синпеле со мынам. Пукон
вылэ кечырскыса ик, сое пыдло-пыдло ватй. Неуж-
то пересь нэнэе кадь, со табаез кулытозям утыса
возё?

Пуны

Верос

- Ошисько мон, ошисько! - синвуоссэ вормытэк, арлыдо кышномурт коркась быззыса потйз, өс куара бөрсяз йыг! шуккиськиз.

Киоссэ, синтэм адями кадь, азылань мычыса мынэ ке но, я татчы, я отчы шеде, канжаське. Пушнер но - пушнер өвөл.

- Ошисько! Я виййтйсько! - та сяна, кыльёс но уг пото ни ымысьтыз.

Кысыкгес шур дуре! Ог куамын вамыш кузьда кусып но солы иськем кадь йётэ. Пыд бордаз биниськись дэремез но та вие мултэс. Кесяса кушты вал!

- Кысыкгес, кысыкгес вуэ!

Турын-куар борды канжаськыса ой усьысал ке, бакча бертиз жильыртйсь шуре тэтчысал ик, дыр.

Ма, со султуса кошке ик вал ни, но, чодем писпу
сямен, берен ас интыяз пограз но, жугем пичи мурт
выллем, викышгьяса бёрдыны шөтаз. Быдэс мугорыз
зурка. Кинлэсь ке ватйськыса сямен, ымнырзэ ды-
рекциясь киосыныз шобыртйз.

Көнә улә ни та музъем вылын, Марьяез таңе
вось өз каре на вал. Ярам, мурт адыми верасал
ке, но ведь ас вордәм пиез! Сюләм улаз нулләм
пиез!

Тыбыраз ныж пуртән бышкалтәм кадь. Куләед
но, маид но, пе, өвөл. Адземе, пе, уг пот ни, чыртыо-
зям вуид, кеськиз пиез. Нош али гинә ук анае шуыса
вазиськылйз.

* * *

Ваник кышнояськем бере улонмы чутрак
воштйськиз. Я солы пöзгтәм сиёнә уг яра, я трос
зулисько. Иське, кышноед, ужысьгыз бертаса, мед
пöзгтоз! Нош зуронме кытчы донгом на, сям сыңе
бере? Мон со понна тыршисько-сюлмаськисько ук!
Ужысь бертә но кузпалэныз кöлонниязы интыясько.
Дорысь ужез воксё вунэтйз ни. Зэм, жаде. Но гужем
мар но уж өвөл. Кыззы толалтэлы дасяськыгтэк? Нош
пудоос?..

Тани туннә но парсь гидысь выж пулзә воштыны
коясь уд-а лу?

- Берло ял карод ни, пие. Парсьёс кыедын уяло.
Бакчамы но жаг пöлы вые ни.

Нош со кутскиз ук:

- Уд вуиськы ке, сомында мерттонэз ой вал! Так пукисько кожаськод-а, мар-а?!

Пыдло но пыдло пыриськиз. Ма, ачим но ой чида, мар люкаськиз, ваньзэ верай. Мыным гинэ кулэ шат?! Соос понна ук! Нош со уг вала, кылыд, пе, кузь, тонтэк тодом. Мар мон соослы кыче ке пуны-а, мар-а? Шорем нянзы но утыр жаль потоз ай! Пичи пизы но, вось карыны турттыса, ветлэ. Со кут тэчки ке но ымзэ медам усья вал!

«Эн мешатьты, эн ёрты» - уретоз пумитэ внуке. Нош мон сое ас пиме кадь яратйсько ук. Кытчы ке мыныкузы, сое мон вылэ кельто. Кема ум ветлэ шуо но, асьсэос вить-куать часлы ышо. Кенлэн калтыртэмез потэ ке, бызёнэз ой вал. Гольтырь-яськонэз бырымтэ на: кильтыр-вальтыр дйсьяске. Ассэ кыче ке дискотекаын кожа-а, мар-а? Валлэн быжыз кузьда йырсиэз лэзьялоз на. Чышкыса кушты вал! Калыклэсь ик возыт. Со анай мурт ук, нош выросьёсыз пичи муртлэсь но отйгес. Тьфу! Эшшо со ик пиме но мон пумитэ пуктэ, дыр. Ма, озы сяна! Лушкем кей сямен ваньзэ лэсьтозы но, мон ик янгыше кылисько.

Кинлы ке вера вал - сюзэм вылын капчигес луысал. Но муртлы ас семья кусыптэ вераны дйсь-тод шат? Огезлы кызы ке но поттылй, кенмылэн сылалтйськемез уггес пörмы шуыса, соиз кут но чүказез ик быдэс гуртлы иворты! Ваняе юн-юн кесёз шуыса, курдасько вал ни. Кызы ке но

чидаз, ява. Больше сыҗе-таҗеос медам ни кылйсь-ке, пе.

Нош туннэ тае но тодаз вайытэк өз кельгы. Кышноез пала только пыре. Кусыпмес, пе, сörиськод. Вожаса улийськод но шуиз.

Вожасал ке!.. Я кызы ас вордэм пидэ вожалод? Куд-ог дыръя азыло кадь шунытэсь кыльёссэ витисько ик. Ма, пересьмисько ни шуыса вераськем но потэ ук! Асэныд ачид бөтгыртыса кыдэке уд ву. Сотэк шузимем мурт кадь.

* * *

Опийсько мон, опийсько! Көтыз уг веська бере, мар мон ас дорам мурт дйнын кадь улом?!

Нылы быземез бере сьöраз öте вал. Малы öй мыны? Люкетто, шуи. Нош татын уг люкетйськы шат?! «Пунылэсь но отй куаныгетйськод!» - кеськиз туннэ Ваня. Ма, уксё кулэ луыку гинэ, со анайзэ аджэ. Эшшо висыку жалямьяське. Нош мон, шузи. Со шуныт вазиськемезлы воксё бырийсько ук. Туж кулэ вал солэн жалямез но!

Тодаз вайиз ке но, бер луоз ни, гырпумзэ куртчыны уз сузы. Тросгес кышноез пала мед пыроз ай, мед ортчытоз ай, аджоз кычезэ. Анай вераз вал, шуоз. Шуоз на меда? Соиз көялоз-вöялоз.

Эх! карьян йыры! Мон будэтй ук сое, котьку ческыт сюдыны, чебер дйсяны тырши. Аслым жеч-жеч пальто басыны гинэ но уксёме öй чыдэты. Весь Ванялы! Нош со тйни кызы...

Ошисько мон, ошисько! Аслым но, соослы но капчиен шокчыны сёто... Нош ошиськисьёсты уг вöсяло, шуо ук... Їок, öз вöсялэ ке но, ошисько!

Кызыы улом бен мон? Котьку кезытэсь, вож-потйсь синьёсты адзыны сюлэм уз чида. Ма, собере öжыт-а адями ассэ быдтэ. Гуртамы ик берло ар-ёс ёже куатез ошиськиз. Вато, му вылэ уг кельто. Соос но чидатэк ошиськизы, вылды... Ма сотэк!

Та дуннеын пунылы гинэ но шуныт кыл, вешам кулэ. Уть, коркась потыкуд, пичи мурт кадь, мае ке витыса, быжыныз солань-талань сэзьяса, учке шорад. Нош уж пöлы выйыса, сюдыны вунэтйськод ке яке мар ке понна куаретйськод, йөттйськод ке, музэ учкыса, кыче жож нискетэ. Со но, дыр, ултйямлы чидатэк, кытчы ке воксёлы кошкысал. Но уг пегзы нокутчы. Дорын жутизы ке но, отын ик жалялозы но, сюдозы но, шуэ, дыр.

Аслам но озы ик трос пол берыктйськылйз сюлэмы, көтжөже кемалы öз возиськы. Табере тырмоз! Амалыз луысал ке, пие туннэ ик коркась воксёлы улясал. Адзем уг пот, мед кулысалыд ни, пе. Ма, со улям öвөл шат?! Капчи-а, мар-а анайлы кылыны сюлэмез кесясь та кыльёсты? Со понна шат будэтй, мусояй, янгыш дыряз но палаз пырылй?!

Огпол Ванялэсь тамак кыскыса пукемзэ атаез адзиз но тырыны турттэ вал ни, соку но пие азе султй. Вожомем дыряз атаез виыса но кельтоз - уз учкы, пиез-а со, кучапи-а. Отйяз но кыскемзэ

атаез кематэк өз тод, лушкемен вози шөдылэмь-
ёсме.

Ма, палаз пыремъёсы сотэк но уно вал. Оло, ёа-
пак соин Ваняе таёе будйз: ассэ котьку шонерен
лыдьясь, мактаськись, вылтйяськись. Бен-бен, та-
тын мон ачим но янгыш!

Озы ке но таёе кыльёсын шат анайдэ «жугод»?
Сюлэмез чидантэм вось каре ук со! Вожпотэм
дыръяз ке но вераз, со кыльёс пуны сыскемлэсь но
юн висьыто.

* * *

Ошисько, ошисько! Тани татчы ик, жужыт кызь-
пуэ. Нокин ветлйесез өвёл. Уз люкетэ. Халатэлэн ка-
лыз но сузёз, дыр...

Э-э, кызьпуэ. Татчы улыны лыктыкум ик, будйсь-
код ни вал. Нош табере мугорыд но пильыльйське-
мын, муресь кисыриосын гождамын. Я, вож ку-
аръёсыд ке но чеберто на тонэ. Нош монэ дэриен
саптазы.

- Ёок, кулэ өвёл сыёе улон! Ошисько!

Викышъясь кышномурт доры шөдтэк шорысь
пичи пуны вуиз. Быжыныз сэзьяса, кот нырзэ ымны-
раз лякыз но синвуэн мисьтйськись бамъёссэ нюлэ.

- Шарик, кошкы, страм! - Марья сое кыыныз
палэнтыны выре вал но, вордосэз лөптэменыз воксё
тэбиниз.

- Мусое, тон ке но уд вунэтйськы, - синвуосыз
выль кужымен өръяськызы. - Мон кулй ке, кин тонэ

сюдоз? Огзылэн но тодазы өвөл. Кин вешалоз? Я, вай чупало, шушметэ. Эн учкы озы. Бөрдй. Öй чида... Ну, мар кулэ? Тон ке но кылме юаса кадь эн учкы.

Шарикез чульк! ымдурзэ нюлыштйз. Марья апай серектйз:

- Я, я, тырмоз! Ойдо, Насыга доры ветлом ай. Пыжиськеменыз сюдо шуэ вал...

Лудчөж

Этюд

Тулыс. Кыжмем лымы, дэрилы пөрмыса, музы-
емен огчөш луымтэ на. Ярдур гинэ но йөлэсь быдэ-
сак мозмытскымтэ. Син шорам шуак йөтйз сьод
уллэ. Умойгес учки но, сүлэмы воксё чигиськиз.
Тол чөже рос-прос сиськытэк урмем куакаослэн
кусо кадь кузесь но лэчытэсь гижыоссы улысь кин
ке мозмытскыны выре. Кеськыны зигарыз ик өвөл.
Чөж кадь. Лудчөж.

Ярдуре матэктй. Йө вылэ султоно-а, өвөл-а?
Вормоз-а со монэ? Чонари вотэс кадь котыр езась-
кылэмын. Оло, доре бертоно? Колийськи, марай ке,
аныкайлэсь кыл кыло.

Өй берытскы. Азылань вамыштй. Ву шоры.
Мынам, тямыс аресъем макелэн, секталае ке
но өвөл, пыд улам йө тачыр-р-р! вазиз. Но мон,

инкуазьлы өчкарыса кадь, мискинъ чөж пала шонтй. Котькуд вамышме чакласа, йө вылтй гылзыса. Куакаос шоры кесеяськисько, соосты уल्याны вырисько. Куарае, ачим сярысь, доразы жоггес вуоз но курдатоз, малпай. Но соос уг ик кыло. Тылобурдоос, быззыны дйсьтымтэме адзыса, уката вожомизы. Лудчөжез кырмыны выро, жутыны туртто. Я огез, я кыкез, я көня ке кузя дэмен кариськыса, озы даурто. Соиз секытгес, лэся - метр кемысен зучак усе. Лобзы вал - кынарыз уг тырмы.

Мырдэм но кызы сузтйськи лудчөже доры. Киям кырми. Мискинълэн көтурдэсьёссэ виروزь быдэс кесеялям ни сьөсьёс. Пйшурасьёс ыбиллям, луоз. Соиз усиз но, сьөдьёс урмизы, дыр.

- Эн кышка, мон юртто тыныд, - сипыртй чөжлы.

Валаз, лэся, лопырьяськемысь, кивысьтым мозмытскыны выремысь дугдйз. Йырзэ кырыжтыса ик, син шорам учкиз-учкиз но чалмиз. Шумпотйз, кожей. Чөжез куртка улам пиям ватй. Ярдуре вуэмме ик ой вала. Лымыез коласа, бакча бертй бертй. Ураметй мыныны малы ке возьдаськи. Куртка улысьтым чөжез ваньзы адзозы, лул быдтйсь карозы, малпай.

Аныкай чөпак укно дурын, чай юыса, пуке вылэм. Ватосме адзиз. Мар, пе, дйсь улад.

Дйсьтыса но дйсьтытэк, лулоез выросэным вось карыны кышкаса, каллен лэзи курткаелэсь

замоксэ. Ъёж өз куареты. Чалмыт, кисмыляк усиз
киосы вылэ. Шорам кезыт ыркыт төл ик пельтйз.
Ас шөдонэлы оскытэк, бурдолэсь синьёссэ утчаны
өдьяй. Кынемын.

Аныкай синвуосме өз ик адзы. Али кулйз-а
шуыса юаз но, лудёөжез пөсьвуаны кошкиз.
Со жытэ семьяосы пыжем сйль сиизы. Мыным
пөлазы пукыны возыт вал. Көлыны выдй сю-
тэм...

Кучапи

Верос

Осто, таҗе җар кезыт куазен но кинлэн кыыз пырем синтэм кучапиосты куштыны! Азбар шорын ик җечыран улэ. Улазы коть шобрет вале вал!

Зөк куртка дйса но, төл пыртй потэ. Одыг интыын сылыку, пыдчиньыос ик кынмыса кужекьяны одьяло. Таҗе куазен, азьвыл сямен, лымыын но уд погылляськы. Урамысь эшъёсын люкаськемлы быдэ лымыез мертаськод ни, макем мур гуштод. Толалтэ одйг нуналзэ но нискылатэк, лымыен лэзьяськытэк, кылем уг поты. Дорад колзё кадь пыриськод ке но, макем мылкыд капчи!

Нош туннэ лымыын погылляськытэк но туж кезыт. Кынмыса лул ик потйське ни. Эшъёс шо-нер лэсьтйллям, кыре потытэк.

Тазы асэныз ачиз вераськыса, кучапиос азе пыдесьяськиз пичи пи. Вить кузя соос. Шунаны турттыса кадь, ог-огзы борды таш-таш лякиськиллям. Гонзы зызы на. Дыгыр-р-р куалекъяло. Жожмыт нискето. Нырѐссэс жутъяны выро. Зынъясько, лэся, кин ай татчы лыктэм шуыса.

- Эн курдалэ, пичиосы, Ромик мынам нимы. Мон тйледыз утѐ, - куалекъясь куараен вазиз эке.

Шуныт пöзыоссэ кисюсаз туллыса, дыгыр-р-р куалекъясь киосыныз кыстйськиз со лул комокъ-ѐс доры. Вадьсазы мыкыртйськыса, витьназэс ик маялтйз. Соосыз, шунытэз шöдыса, эшшо золгес куалекъяны öдъязы, пыд улысь музъемез ик зуркато кадь. Кие куриськыса выллем, ог-огзы былэ тубо синтэмѐс: монэ нырысь кут, монэ. Ваньзы ик горд-гордэсь, быж йыльѐссы гинэ тöды буёлэ ветылэмын кадь. Пичиесь нырѐссэс былэ но былэ жуто, тани-тани Ромалэн ымныр бордаз лякиськозы.

Осто, жальзылы уд чида! Пыдесьяськыса сыйсь Рома эшшо золгес куалекъяны кутскиз. Таяз рад - бöрдэменыз. Зэм, синвуосыз музозь уг вуо - бам вылаз ик йöлы пöрмо. Аслаз киосыз но эбылязы ни. Нош со ялан кучапиосты маялля.

- Мон утѐ тйледыз, одно утѐ, - асьсэлы гинэ кылымон сипыртэ пияш. - Одно ик шунто тйледыз, шунто но сюдо.

Кылзйськисьтэм чиньыосыз дйсезлэн замоказ кутъазы. Куртказэ шуак пертчоз но пияз кучапиосты поноз. Озы малпаз вал Рома. Но замокез ёрказ. Басма юдэс висказ сюрем, лэся - ноказыы но усьтонлы уг сётйськы. Кысканъяз эшшо золгес ёрказ. Дыртыку уго ваньмыз мыдлань луэ.

- Эх, карьян, мар тон озы өч кариськод? - зар-зар бёрдыны кутскиз ини Рома. - Усьтйськы жоггес! Кучапиос кынмо ук! Туж зол кынмо ни! Кулйзы ке? - ялан кыска пияш замоксэ.

Соиз мырдэм сётйськиз ик. Но отчюзь Ромалэн чиньыосыз жуаны өдъязы ни. Соосты шунтыны турттыса, эке киоссэ ымдураз вуттйз. Ну шока ук, ну шока! Но пушкысьтыз воксё но шунит омыр уг поты ни кадь.

- Дорын шуналозы ай, шунит ву улэ донги ке, - шуиз со.

Кылзйськисьтэм киосыныз мырдэм кутйз огзэ кучапиез. Оло синъёсаз учкыны турттыса, оло тодманы йөндырыса, Рома шораз уёртйз. Черкын баёколэсь бакельзэ курем сямен, кы-мезаз чупаз но пияз понйз. Огез отчы капчиен тэриз. Нош кыкетйезлы куртка улын инты воксё өвёл ни. Озы но, тазы но выриз Рома, номыр уг пөрмы.

- Салазкиме ке но кутано вылйськем съёрам. Соку ваньдэсты пуктысал но подъездам кемалась пыртысал ни. Милям отын шунит. Тубат улэ ин-

тыясал, дорысь тйледлы сиён, небыт чүшкон поттысал. Мамалэсь чечызэ лушкасал на. Мон кынмисько ке, со монэ чечыен сюдэ. Только аракыен сура. Туж каньыл луэ собере, мугор ик зырда. Но тй аракы юиды ке, кудзыса погралоды. Тйледылы чечыен гинэ но яралоз.

Рома солань-талань учёртйз. Азбарысь лошьяськись кылёнкаез ке но синйылтоз кожаз вал. Но номыр но сыче-тачеез өвёл.

Собере кучапиос вылэ, өрзи кадь, шуак лэзиськиз. Пичи зыгыртэгаз ваньзэсты кырмыны выриз. Пөрмиз кадь. Али пыдес йылысьтыз жутйськоз но нуоз соосты ваньзэсты дор палаз. Но султыны дауртонъяз кучапиосыз, чиньы вискытй виясь кеньыр сямен, оген-оген музэ усьылйзы.

- Мар куртчиськыны но уд валаське тй! Куртчиське дйсям!

Рома нош ик кучапиосыныз жутйськыны выре. Нош ик өз пөрмы. Комокъёс сокем секытэсь но өвёл кадь, но оло чиед мугораз кужымез уг тырмы, оло киосыз сокем-сокем кынмемын ни.

- Мон тодй, мар карыны! Нырысь куиньнадэс нуо, собере кылемъёсыз съёры берытско на.

Та малпанэзлы Рома ачиз ик лөптйз. Бурдяськиз кадь. Шуак жутйськыны кужымез но кытыське потйз. Солэн татчюозь таچه зол бызьялэмез ноку ой вал кадь. Эшъёсыныз уйылысен шудыкузы, огзэс

но ноку сутыны өз быгатылы. Нош татын воксё но перияськиз. Гуштэ, усе, выльысь султэ но бызе. Кучапиос но гылзыса зыгыртэтысьтыз усё. Пиек вылазы ик канжаське. Но нош ик жутэ но азылань бызе. Эшшо ке комокъёссэ буйгатыны кужым но шедьтэ на: ваньмыз умой луоз, эн бөрдэ, пе. Ачиз шокан пась но уг шедьты ни.

Коркась подъездаз, ярано коть, өсэз пась вал. Куртка кисяз бугырьяськыны солэн али воксё дырыз өвёл. Кучапиоссэ тубат улэ тыриз но, азычынъызэ жутыса, дышетись кадь куаретйз:

- Татын шыпыт пуке, мон щас вуо!

Вуиз со, зэмен ик, туж жог. Кучапиос интысьтызы вырзыса ик вутгйллямтэ кадь. Ачиз но кужымтэк вөзасы пуксиз. Чиньыоссэ эх, шунтыны выре ук, эх, шока шоразы! Пиньёсыз ваче йыгасько ни. Нош со ялан маке вераны выре:

- Мон тйледыз ваньдэсты дорам пыртысал. Но мамалэн туж зол вожез потоз. Мон солэсь кемалась курисько ни пуны. Нош со вазе гинэ: тон ачид кучапи кадь на, астэ ачид сюдыны но, миськыны но уд вормиськы. Ачим утялто, шуисько но, со мукет вераськон мытэ. Квартирамы, пе, пичи, пунылэн гонэз усёз, зын потоз, бадзым коркамы луиз ке, соку, пе, утйсез вордом. Бадзым коркамы ку луоз ай! Туннэ папамы гинэ но өвёл ай. Нош сотэк нокрыче корка. Писэй басьтон пумысен вераськон поттылыкум гинэ но,

мама нырзэ кисыртэ. Но тй эн курдалэ: мон тйледыз уг кушты! Эшъёсыным шудыны но уг пота - тй вöзын уло. Садысь бертй ке, соку ик тйледыз сюдо, вешало. Эшъёсылы возматй ке, оло, соос но куддэс ке басытозы.

Кучапиос, верамзэ валаса кадь, вылаз тубыны кутскизы. Нискето но нискето. Таослэн сиемзы потэ, дыр. Озы шуыса, Рома кисысыстыз кампет поттйз. Ачиз ик возьдаськиз кадь: кучапиосыз вить кузя, нош кампетэз одйг гинэ. Аслаз пертчемез но уг луы - киосыз ноказыны но уг шунало ни.

- Я, пиньды вань ук, бумагазэ кесялэ но пичиен ваньды сюпсе ни. Ми эшъёсынымы чупачупмес огомылы нюлыштыны сётйськомы ук.

Но ньыльпыдоослы кампет маке кадь, пе! Сое зыньяны но öз турттэ. Рома ымазы но сое донганы выриз - толыкез сычегес!

- Мар сиёды тй? Мама чукна курег макес пöзтйз вал. Но ми сое нуназе ик сиимы ни. Льюссэ но куштймы ни. Печення потто. Соиз туж ческыт. Ачим чукна чай юи - кылме ньылйсько вал.

Кучапиос огзылэсь золгес мукетыз нискетыны öдьязы. Рома валаз: печенняез соос уг ярато. Соку Рома вазиз:

- Няньмы вань на. Щас шоро но потто.

Кучапиоссэ кымесазы чупаса-чупаса ик, султйз Рома. Пыдесъёсыз шальтрам уробо кадесь -

мугорзэ уг вормо, дыгыр-р-р куалекъяло. Лифт шуонзы өвөл. Мырдэм но кызы тубиз со куинетй этажозь. Усытонзэ тунгонэ донгиз но эх, позыртыны выре ук - чиньюсыз сое бералтыны уг вормо.

Шальтыртэмзэ анаез кылйз но өсэз усьтйз. Эбылям пизэ адзыса, со воксё куалектйз: тон кытын сокема ветлйськод, пе. Ромалэн ымыз ик усьтйськиз ни вал вераны, со кучапиосты быронлэсь утиз шуыса. Но малпаз: анаез таће выросэз понна воксё но тышкаськыны быгатоз. Тани ук куаретэ ни: лызэктэмед ни, тани висьыны усёд. Жоггес, пе, кылиськы но шунут вуын пук. Ромалэсь «мынам кыре потано ай» шуэмзэ со кылэм-адзем ик өз кары. Пизэ ачиз кылыны кутскиз. Ваннае ву лэзиз. Отчы сылал кисьтйз но пизэ пуктйз. Ачиз со куспын кошкиз чечыен аракыез пöсятаыны.

Їушиськемзэ но, курытсэ юэмзэ но Рома уйвöтын кадь гинэ шöдылйз. Валесэ выдтэм бере со, секыт кор жутьям мурт кадь, супрак умме усиз. Сайказ ни çукна гинэ, ымныраз шунды пиштэмен. Анаез бордаз пуке. Кöдэктэмын. Бамыз кузя синву ваське. Тон малы, пе, монэ курдатйськод. Рома нырысь мазэ-созэ өз ик вала. Берло гинэ ачиз но шöдйз: мугорыз зырдамын, дыльдызэ ньылыны вöсь, зигарыз өвөл.

Озы ке но со ури-бери султйз но дйсяськыны кутскиз. Анаезлэн «тынды кыллыны кулэ» шу-эмезлы пумит Рома вазиз:

- Часталы гинэ лэзь монэ. Мон кучапиосылы кылме сётй. Доразы васькало но берен пыро. Со-осты сюдоно.

Анаеныз ёош тубат улэ васькемзы бере одйг кучапиез но өз шедьтэ...

Литературно-художественное издание

Сараматова Елена Александровна

ЛУДЧӖЖ

Рассказы

На удмуртском языке

Подписано в печать 27.04.2015 г. Формат 11,5x16,5
Бумага: 80 гр., обложка 300 гр. Печать на ризографе.
Тираж 100 экз. Заказ № 2927/04

В авторской редакции

Вёрстка, дизайн *В. Д. Штыкова*

АУ УР «Редакция газеты «Удмурт дунне».
Адрес: 426008 г. Ижевск, К. Маркса, 274.
Тел. (3412) 73-33-42. E-mail: udmdunne@udmnet.ru

Отпечатано отделом оперативной полиграфии
АУ УР «Редакция газеты «Известия Удмуртской Республики».
Адрес: 426011 г. Ижевск, ул. Пастухова, 13.
Тел. (3142) 902-135. E-mail: poligrafur1@yandex.ru